

七十二家集

沈隱侯集卷之八

梁吳興沈約休文著

明閩漳張熨紹和纂

表

上宋書表

臣約言臣聞大禹刊木事炳虞書西伯戡黎功
煥商典伏惟皇基積峻帝烈弘深樹德往朝立
勲前代若不觀風唐世無以見帝嫺之美自非
觀亂秦餘何用知漢祖之業是以掌言未記爰

動天情曲詔史官追述大典臣實庸妄文史多闕以茲不才對揚盛旨是用夕惕載懷忘其寢食者也臣約頓首死罪竊惟宋氏南面承歷統天雖世窮八主年減百載而兵車亟動國道屢屯垂文簡牘事數繁廣若夫英主啓基名臣建績拯世夷難之功配天光宅之運亦足以勒銘鐘鼎昭被方策及虐后暴朝前王罕二國釁家禍曠古未書又可以式規萬葉作鑒于後宋故著作郎何承天始撰宋書草立紀傳止於武帝

功臣篇牘未廣其所撰志唯天文律曆自此外
悉奏奉朝請山謙之謙之孝建初又被詔撰述
尋位病亡仍使南臺侍御史蘇寶生續造諸傳
元嘉名臣皆其所撰寶生被誅大明中又命著
作郎徐爰踵成前作爰因何蘇所述勒爲一史
起自義熙之初訖于大明之末至於臧質魯爽
王僧達諸傳又皆孝武所造自永光以來至於
禪讓十餘年內闕而不續一代典文始末未舉
且事屬當時多非實錄又立傳之方取捨乖衷

進由時旨退傍世情垂之方來難以取信臣今
謹更創立製成新史始自義熙肇號終於昇明
三年桓玄譙縱盧循馬魯之徒身爲晉賊非關
後代吳隱謝混郗僧施義止前朝不宜濫入宋
典劉毅何無忌魏詠之檀憑之孟昶諸葛長民
志在興復情非造宋今竝刊除歸之晉籍臣遠
愧南董近謝遷固以閭閻小才述一代盛典屬
辭比事望古慙良鞠躬跼蹐視汗亡厝本紀列
傳續寫已畢合志表七十卷臣今謹奏呈所撰

諸志須成績上謹條目錄諸省拜表奉書以聞
臣約誠惶誠恐頓首頓首死罪死罪

上注制旨連珠表

竊尋連珠之作始自子雲放易象論動模經誥
班固謂之命世桓伊以爲絕倫連珠者蓋謂辭
句連續互相發明若珠之結排也雖復金鑣互
騁玉軌並馳妍媸優劣參差相間翔禽伏獸易
以心威守株膠瑟難與適變水鏡芝蘭隨其所
遇明珠燕石貴賤相懸

爲柳世隆上銅表

夫幣以周務貨以賑民阜國康治莫尚乎此周
氏致平始于圜法漢世幾措資于貫朽名鑪化
金良工盡藝方將盈金中藏收功上苑南楚陋
其方府西京鄙其部內

上建闕表

恭惟哲后舊章必修眇瞻前王復古爲貴伏惟
陛下欣谷故實率由令典昔在有晉經創江左
邦訓莫罄遠圖多缺萬雉之外兩觀弗興空指
南峰懸法無所世歷三代年將二百非所以經
世成務垂業後昆天德圓應憲章自遠宜詔匠
人建茲象闕俯藉愛禮之心以申子來之願式
表端闈儀刑萬國使觀風而至復聞正歲之典
遐想之士少寄懷古之目

爲柳兗州世隆上舊宮表

舊宮蘊靈千古合祥百代萬祇相祉八神警室
事超齊甸義邁燕宮故能屬輦道於天階命帝
闕於霄路實宜樹闕疏壤寫極上穹克播徽塵
永光盛烈

舉胡元秀表

竊惟經邦御遠雖待大賢摧鋒犯鎬亦資小用
伏見錢塘新城主胡元秀早歲驅馳意幹強果
矛盾之用氣凌百夫若置之六師之間處之一
旅之上必能前奮殲敵却沮強胡臣實弱懦不
窺武節昧罔輕言伏懷悚懼

薦劉榮表

陛下則天間業冠帶宴荒輶軒韋轂交軫於遐
路拾策投竿相望於魏闕或以開圻未採管庫
遺賢執戟忘疲倚輶不息

與沈淵薦沈麟士表

吳興沈麟士英風夙挺峻節早樹貞粹稟於天
然綜博生乎篤習家世孤貧藜藿不給懷書而
耕白首無倦挾琴採薪行歌不輟長兄早卒孤
姪數四攝庖鞠稚忝苦推甘年踰七十業行無
改元嘉以來聘召仍疊玉質踰潔霜操日嚴若
使問政王庭服道槐掖必能孚朝規於邊鄙播
聖澤於荒垂

沈麟士與沈約書附

名者實之賓本所不庶中央無心空勤南比
爲惠反凶將在於斯

爲柳世隆讓封公表

臣聞懸旌玉塞貳師尙黜其功伐鼓炎州伏波
猶懼其賞徒以兼委之施或難固辭拙心之情
必無雙奪是故俛容青閣願還慈於裂壤竊步
丹墀希收寵於開賦昔竄命窮維難迫勢孤沈
板木難負戶非切及顧溫清之館懼結尊慈之
懷累葉嗚嗚舉門惴惴臣事逼君親理非外獎
實賴朝謨謹肅宰略遐震奔鯨外剿臣何力焉
幸得扶老携弱重出幽堵還軸歸驂再踐鄉路

豈可資國青以邀其功因衆功而饗其報遂使
甘霜受電之心有同於飾請皎日大河之志匪
殊於貌調

爲褚炫讓吏部尚書表

竊惟玄素未辨必謬朱紫之察規矩或昧理喪
方圓之功東西兩漢左雄孤絕於前南北二晉
山濤莫嗣於後良由性藏於貌才隱乎心楚越
無以況其迥殊山用未足方其險阻雖復挫暗
爲明勉思生智亦何以登奇拔異離渭分涇

爲南郡王讓中軍表

臣聞建侯茂則非賢罔樹分器鴻典惟懿寔先
而臣挹道未弘踐義多缺徒升國彝空襲宸寵
光珪華組晻藹於關垂令采徽猷寂寥於甸表
晨仰委帶夕軫臨顏皇衢肇啓鼎運始資魯衛
兼啓義邈周年齊楚並建禮高漢日臣以末第
聯輝上序祐履荆阿懷璽夢曲拊志惟熏佩握
如擣

爲始興王讓儀同表

徒塵翠渥方降紫泥以茲上令用隔下情況高
擬萬石爰均八命室等天潢服加黼黻出則高
陪千乘入則仰司百揆陛下道苞九舜明出十
堯萬微必理一物興念有紆玄鏡暫垂止水

讓僕射表

臣聞役壯休老上典所優晨行暮息事身恒分
若夫玄黃未已非秋駕之衛筋力爲用豈強飯
之時養老杖鄉抑推前典服戎告謝親學匪任
宿肉極其虛憊歲制防其不辜寔所以蠲假衰
疾收屏淪暮

讓五兵尚書表

臣聞百舍之趙非宿春所資千里之越豈一輦
能泝何者裝輕適于路遠舟弱疲於濟深醜貌
悴容不藉鑒於溜水驚足蹇步終取躓於鹽車

爲皇太子謝表

臣實蒙稚溫文以闕不閑三善之訓未習四學
之儀雖問安內豎因心自發而視膳寢門未任
再至乃降皇慈夙膺盛典貳體宸極守器宗祧
顧循幼志如臨冰壑

爲長城公主謝表

奉策書封妾爲長城縣公主徽命降臨慙腴妄
寘妾膺靈稟氣育景璇閨弱志易淪柔德難樹
雖復式脩姆保莫敢或違而肅雍不著穠華蓋
闕不悟宸暉曲漸彝章夙賁籍此恩加遽延典
策湯沐光啓珩紕昭被

謝封建昌侯表

陛下投袂萬里拯厥塗炭臣雖心不吠堯而迹
淪桀犬此則王業始基臣所不與徒荷日月之
私竟無蒸燭之用天命玄鳥非止今日受命作
周其來久矣雖復備數樂推與同謳頌而誠微
弱草效闕織塵遂班山河之誓叨佐命之賞亦
何以慰悅帷帳酬報爪牙

謝母封建昌國太夫人表

伏見詔書以臣母封爲建昌國太夫人慶溢蓬
門榮流素族恭荷屏營罔識攸寘臣稟訓私闔
志塗靡立勉以爲義誠有由然輸力致身曾無
萬一天慈罔已至德彌光探其私志降此洪澤
榮親之至始自微臣率斯道也方流萬物草卉
輕命固莫云酬

到著作省謝表

臣約言卽日被召以本官兼今職臣藝不博古
學謝專家乏懷鉛之志慙夢腸之術聯事乖善
握蘭慙良謬勒斷蛇之符預刊水河之業路遙
難騁才弱未勝而神工曲造雕絢彌疊珥筆史
觀記言文府趨奉載揚腴懽交頽

拜尙書令到都謝表

竊位之譏允當斯責王命私請有事相傾油雲
湛露徒降晏吳之德弱縞輕蟬不載丘嶽之重
登階望席恍焉失步

謝宜皇太子賜絹表

臣聞重離在天八紘之所共仰明兩作貳萬國
所以咸寧太子體岐弱載表膺坤茂典冊旣升
休祚方遠率土含歡遐邇均抃天情載洽慶賜
必周幣帛嘉貺猥班庸勞

謝賜新曆表

竊惟觀斗辨日馭生爲本審時分地稼政莫先
何則勝殺無舛拘忌之理難忽珠璧有徵禮節
之原攸序

致仕表

徒以桑榆無幾時制行及不朝之禮忽在今辰
使反身敝廬待終窮巷臣又聞之懸車散髮其
來舊矣昔廣德請骸義在量力二疎知止愚貽
後悔數年以來稍就盡竭氣力衰耗不自支持
若蒙天地大恩造物洪施拯其隆滿之切救其
害盈之災譬彼日昃假榮終朝踟躕夕景少觀
盛化宅壤歸泉自無云幾祈仁仰澤事止寸陰

臨終遺表

臣約言臣抱疾彌留迄今卽化形神欲離月已
十數窮楚極毒無言以喻平日健時不言若此
舉刀坐劍比此爲輕仰惟深入法門厲茲苦節
內矜外恕寔本人情伏願聖心重加推厲微臣
歸途無復遺恨雖慙也善庶等鳴哀

章

爲安陸王謝荊州章

臣托景宸區早延休寵身班帝穆爵首藩圭好
禮慚河敦詩愧楚懸旆出關徒違絳闕擬金入
濟識謝戎麾而照臨彌廣復叨匪服紀南形勝
任總上游西緯岷邛北維嶠陝六轡在手猶或
稱難羣牧稟威茲道孰易是以攄情陸白布款
幄垂霄塗嚴遠事隔披照腆冒斯顏膺此謬荷
祇奉競懼罔知攸記

爲晉安王謝南兗州章

臣以某羣幼無秀業依天宅照藉海憑瀾王爵
早加藩麾夙樹進不能閑詩西楚好禮北河退
無以振采六條宣風萬里懷慙起懼載溢心顏
而皇明輝燭照被彌遠遂乃徙旆淮區遷金濟
服朱轡出邸青組臨方瞻惟徵寵俯仰忘厝

爲六宮拜章

蓬閨菲質嘉淑無筭越自幽衡登軀宸漢奉日月之華侍巾櫛之末何以廁駕鸞之盛序奉屬車之清塵

沈隱侯集卷之九

梁吳興沈約休文著

明閩漳張燮紹和纂

彈文

奏彈王源

給事黃門侍郎兼御史中丞吳興邑中正臣沈約稽首言臣聞齊大非偶著乎前誥辭霍不婚
垂稱往烈若乃交二族之和辨伉合之義升降
宸隆誠非一揆固宜本其門素不相奪倫使秦

晉有匹涇渭無舛自宋氏失御禮教彫衰衣冠
之族日失其序姻婭淪雜罔計厮庶販鬻祖曾
以爲賈道明目腆顏曾無愧畏若夫盛德之胤
世業可懷樂御之家前徽未遠旣壯而室竊貲
莫非阜隸結褵以行箕帚咸失其所志士聞而
傷心舊老爲之歎息自宸歷御寓弘革典憲雖
除舊布新而斯風未殄陛下所以負宸興言思
清敝俗者也臣實懦品謬掌天憲雖埋輪之志
無屈權右而狐鼠微物亦蠹大猷風聞東海王

源嫁女與富陽蒲氏源雖人品庸陋冒實參華
曾祖雅位登八命祖少卿內侍帷幄父璿升采
儲闈亦居清顯源頻叨諸府戎禁預班通徹而
託姻好唯利是求玷辱流輩莫斯爲甚源人身
在遠輒攝媒人劉嗣之到臺辨問嗣之列稱吳
郡蒲璋之相承云是高平舊族寵奮胤胄家計
溫足見託爲息鸞覓婚王源見告窮盡卽索璋
之簿閱見璋之任王國侍郎鸞又爲王慈吳郡
正閭主簿源父子因共詳議判與婚璋之千金

五萬以爲聘禮源先喪婦又以所聘餘直納妾如其所列則與風聞符同竊尋璋之姓族士庶莫辨滯奮身殞西朝胤嗣殄沒武秋之後無聞東晉其爲虛託不言自顯王滿連姻寔駭物聽潘楊之睦有異於此且買妾納媵因聘爲資施於之費化克牀第鄙情贅行造次以之糾慝繩違允茲簡裁源卽罪王臣謹案南郡丞王源忝藉世資得參纓冕同人者貌異人者心以彼行媒同之抱布且非我族類往哲格言薰不蕪雜

聞之前典豈有六卿之胄網女於管庫之人宋
子河魴同穴於輿臺之鬼高門降衛雖自己作
蔑祖辱親於事爲甚比風帝翦其源遂開黜世
塵家將被比屋宜寘以明科黜之流伍使已污
之族永愧於昔辰方嬖之黨華心於來日臣等
參議請以見事免源所居官禁錮終身輒下禁
止視事如故源官品應黃紙臣輒奉白簡以聞

奏彈孔稚珪違制啓假事

臣聞禁憲有章士子攸慎守官有典觸網斯及
蓋所以崇威剛法下肅上尊謹案廷尉會稽邑
中正臣稚珪歷奉朝班頻登要近九棘之任理
無休謁冒制干聞實虧恒典恩許雖降所制不
關違犯之條猶合約黜且稚珪俯自內轄作士
下闡通制明文日陳凡案自踰規矩莫斯爲甚
臣等參議請以見事免稚珪所居官除中正官
名輒下禁止

奏彈奉朝請王希聘違假

謹案奉朝請臣王希聘幸齒朝班私敬蓋闕休
請有期曾無適及違弛之僞允膺裁糾臣等參
議請以見事免所居官輒下禁止

奏彈御史孔橐題省壁悖慢事

謹案奉朝請臺侍御史臣孔橐淺劣無聞謬列
華省假托去來仕子常務况東臯賤品非藉豐
資旬日暫勞豈云卑辱而肆此醜言題勒禁省
比物連類非所宜稱黜之流伍寔允朝憲臣等
參議請以見事免橐所居官輒下禁止

奏彈秘書郎蕭遙昌

謹按兼秘書郎臣蕭遙昌盛戚茂年升華秘館
淑慎之迹未彰違情之容已及宜寘徽網以肅
朝風請以見事免遙昌所居官

奏彈王僧佑

僧佑爲太子中舍人在直屬疾
不待對入輒去中丞沈約彈之

肆情運氣不顧朝典揚眉闊步直轡高驅

脩竹彈甘蕉文

長兼淇園貞幹臣脩竹稽首臣聞芟蕪蘊崇農
夫之善法無使滋蔓翦惡之良圖未有蠹苗害
稼不加窮伐者也切尋蘇臺前甘蕉一叢宿漸
雲露荏苒歲月擢本盈尋垂蔭含丈階緣寵渥
銓衡百卉而予奪乖爽高下在心每叨天功以
爲已力風聞籍聽非復一塗猶謂愛憎異說所
以挂乎嚴網今月某日有臺西階澤蘭萱草到
園同訴自稱雖慚杞梓頗異蒿蓬陽景所臨由

來無隔。今月某日。巫岫歛雲。秦樓開照。乾光弘
普。罔幽不矚。而甘蕉攢莖。布影獨見。鄣蔽雖處。
臺隅。遂同幽谷。臣謂偏辭難信。敢察以情。登攝
甘蕉。左近杜若。江蘼。依源辨覆。兩草各處異列。
同欵。既有證據。羗非風聞。切尋甘蕉。出自藥草。
本無芬馥之香。柯條之任。非有松栢後彫之心。
蓋闕葵藿傾陽之識。馮藉慶會。稽絕倫等。而得
人之譽。靡卽稱平之聲。寂寞遂使言樹之草。忘
憂之用。莫施無絕之芳。當門之弊。斯在。妍賢敗

政孰過於此而不除戮憲章安用請以見事徒
根剪葉斥出臺外庶懲彼將來謝此衆屈

啓

賀齊明帝登祚啓

竊惟皇源浚遠帝寶連暉基深慶厚道貫萬葉
而鬱林凶德早樹行悖人經逃聽之所未書宗
廟之始如綴百靈聳動九服廻遑結后來之望
思庇民之主日月以冀遐邇翹心伏惟陛下大
聖在躬君德夙表龍章日綵煥若麗天納麓賓
門道風遐被睿化神行無思不洽獄訟允歸天
人戴仰屈飛龍之眇轡紆汾陽之遠情運堯心

以臨億兆敷舜烈以膺寶命雖中宗之興殷道
宣后之隆漢德異世同符千載一揆刑措之業
方遠隆平之基在焉率土含欣懷生戴顙况臣
早蒙覆潤夙荷恩靈踴躍外畿心不勝慶謹繙
民和式流皇澤塗歌里并載懷臆藻

上錢隨喜光宅寺啓

伏惟中陽故里春陵舊居夷漫滌蕩曾無遺築
若使大教早流法遵二代開塔白水樹剎枌榆
可以傳美垂跡迄今不朽

送育王像并上錢爛等啓

竊以無名無色理絕應感不身卽身猶觀願力
惟願燈明道成長爲人喜之侶菩提無上永廁
千子之蹤

謝賜甘露啓

約言左右徐儼宣勅垂賜法音寺松葉上甘露
臣往年經見不過霑條而已時或凝結纔若輕
霧未有玉聚珠聯光粲若是寔由積仁上通冥
德下降故能委華霄極雲被後彫慈旨曲洽頒
此祥賚不任欣荷謹以啓事謝以聞

謝勅賜冰啓

竊惟司寒輟響耿自前代凌室曠官歷茲永久
聖功闡物逸典備甄窮深旣採園池靡用有籍
羔秬無災霜雹

約又有謝賜交州檳榔啓
云龍緇嘉實駁包遐遠

謝賜軫調絹等啓

霜紕雪委霧縠冰鮮昔劉氏歸國未聞漢儲之
禮曹植還蕃非降魏兩之賜恩逾枉道賁深束
帛

謝勅賜絹葛啓

素采冰華
絺文霜潔
變溽暑於
閨閣
起涼風於
襟袖

謝齊竟陵王敎撰高士傳啓

竊聞高尚其事義光爰象賢者避世聲煥典墳
豈徒激貪勉競澡身浴德而已爾乃大弘義訓
百代通風是以梁鴻蘇伯記遠迹於前叔夜士
安書高塵於後雖去取異情羣略殊軫而獨行
必彰片言罔極貞操與日月俱懸孤芳隨山經
共遠明公得一含道體二居宗迹屈巖廊之下
神游江海之上愛奇商洛訪美東都蓋欲隱顯
齊功出處同致巢由與伊且並流三辟與四門

共軌肅奉明規思自罄坊

謝齊竟陵王示華嚴瓔珞啓

竊以六詩雨散百氏雲興或事止褒刺或義單
小辯莫不雕風煙之氣狀流日月之英華明公
該玄體妙凝神宙表廕法雲於六合揚慧日於
九天因果悟其初心菩提證其後業陟無生之
遠岸汎正水之安流受三遠十號之尊崇建四
辨八聲之妙極法身與金剛齊固常住與至理
俱存

謝齊竟陵王示永明樂歌啓

鳳綵鸞章霞鮮錦繡觀寶河宗未必比麗觀樂
帝所遠存懃德雖日月在天理絕稱詠而徘徊
光景不能自息

謝竟陵王賚舄赫國雲氣黃綾裙繡啓
竊以積絲成綵散繭騰花巧擅易水之間價貴
藁臺之下民受祿爲養霑荷彌深聖恩曲漸自
葉流根複袖緼裾豈伊恒飾榮新之寵固難輕
報

謝女出門宮賜絹綺燭啓

桓室金縷本非所議孟姬作具獨若未周慈澤
曲臨珍華兼重製爲美服隻綺易儔舉而不息
三夜有待

謝司徒賜北蘇啓

曠阻陰山之外眇絕蒲海之東自非神力所引
莫或輕至聖慈曾洽遂遍芻蕘停鑣懼喘旣弘
道於世務方駕四衢又興言於俗表

爲柳世隆謝賜樂游胡桃啓

挺自禁園味逾井絡動物廻祇在微必應此乃
胡羯奔逃吉之先見者也

爲東宮謝勅賜孟嘗君劍啓

田文重氣徇名四豪莫及寶劍雄身故能威陵
秦楚人高事遠遺物足奇謹加玩服以深存古
之懷

爲皇太子謝賜御所射雉啓

輕鑿微動密翳徐張黃閒所發矢無虛發南皮
之獲未足稱工臣任惟守器事隔陪奉天慈曲
降賜物頒會

荅釋法雲啓

神本不滅久所服膺神滅之談良用駭惕近約
法師殿內出亦蒙勅荅臣下一本懼受頂戴尋
覽忘疲豈徒伏斯外道可以永摧魔衆孔釋兼
弘於是乎在實不刊之妙旨萬代之舟航弟子
亦卽彼論微厝疑駁比展具以呈也沈約呈

釋法雲與朝貴書附

主人荅臣下審神滅論今遣相呈夫神妙寂
寥可知而不可說義經丘而未曉理涉且而

猶昏王上頻天照本襲道赴機垂蒼臣下旨
訓周密孝享之禮旣彰桀懷曾史之慕三世
之言復闡紂恻波嶮之情預非草木誰不歌
歎希同挹風猷共加弘讚也釋法雲呈

沈隱侯集卷之十

梁吳興沈約休文著

明閩漳張燮紹和纂

書

與徐勉書

吾弱年孤苦傍無耆屬往者將墜於地契濶屯
邇困於朝夕崎嶇薄宦事非爲已望得小祿傍
此束歸歲逾十稔方忝襄陽縣公私情計非所
了具以身資物不得不任人事永明末出守東

陽意在止足而建武肇運人世膠加一去不還
行之未易及昏猜之始王政多門因此謀退庶
幾可果託卿布懷於徐令想記未忘聖道聿興
謬逢嘉運徃志宿心復成乖爽今歲開元禮年
云至懸車之請事由恩奪誠不能弘宣風政光
開朝猷尙欲討尋文簿時議同異而開年以來
病增慮切當由生靈有限勞役過差總此凋竭
歸之暮年牽策行止努力祇事外觀傍覽尙似
全人而形體力用不相綜攝常須過自束持方

可僂俛解衣一卧支體不復相關上熱下冷月
增日篤取煖則煩加寒必利後差不及前差後
劇必甚前劇百日數旬革帶常應移孔以手握
臂率計月小半分以此推算豈能支久若此不
休日復一日將貽聖主不追之恨得欲表聞乞
歸老之秩若天假其年還得平健才力所堪惟
思是策

荅陸厥問聲韻書

宮商之聲有五文字之別累萬以累萬之繁配五聲之約高下低昂非思力所學又非止若斯而已也十字之文顛倒相配字不過十巧歷已不能盡何況復過於此者乎靈均以來未經用之於懷抱固無從得其髣髴矣若斯之妙而聖人不尚何邪此蓋曲折聲韻之巧無當於訓義非聖哲立言之所急也是以子雲譬之雕蟲篆刻云壯夫不爲自古辭人豈不知宮羽之殊商

徵之別雖知五音之異而其中參差變動所昧實多故鄙意所謂此秘未覩者也以此而推則知前世文士便未悟此處若以文章之音韻同絃管之聲曲則美惡妍蚩不得頓相乖反譬猶子野操曲安得忽有蹌緩失調之聲以洛神比陳思他賦有似異手之作故天機啓則律呂自調六情滯則音律頓舛也士衡雖云炳若縟錦寧有濯色江波其中復有一片是衛文之服此則陸生之言卽復不盡者矣韻與不韻復有精

麤輪扁不能言之老夫亦不盡辨此

陸厥與沈問聲韻書附

范詹事自序性別宮商識清濁特能適輕重
濟艱難古今文人多不全了斯處縱有會此
者不必從根本中來尙書亦云自靈均以來
此秘未覩或暗與理會匪由思至張蔡曹王
曾無先覺潘陸顏謝去之彌遠大旨欲使宮
商相變低昂外節若前有浮聲則後須切響
一簡之內音韻盡殊兩句之中輕重悉異辭

既美矣理又善焉但觀歷代衆賢似不都闢
此處而云此秘未覩近於誣乎案范云不從
根本中來尙書云匪由思至斯則揣情謬於
玄黃摘句差其音律也范又云時有會此者
尙書云或闢與理合則美韻清謳有辭章調
韻者雖有差謬亦有會合推此以往可得而
言夫思有合離前哲同所不免文有開塞卽
事不得無之予建所以好人譏彈士衡所以
遺恨終篇旣曰遺恨非盡美之作理可詆訶

君子執其詆訶便謂合理爲闇豈如指其合理而寄詆訶爲遺恨邪自魏文屬論深以清濁爲言劉楨奏書大明體勢之致齟齬妥帖之談操末續顛之說興玄黃於律呂比五色之相宣苟此秘未覩茲論爲何所指邪愚謂前英已早識宮徵但未屈曲指的若今論所申至於掩瑕藏疾合少謬多則臨淄所云人之著述不能無病者也非知之而不改謂不改則不知斯曹陸又稱竭情多悔不可力強

者也。今許以有病有悔爲言，則必自知無悔。無病之地，引其不了，不合爲闇，何獨誣其不合一了之明乎？意者亦質文時異，今古好殊，將急在情物而緩於章句，情物文之所急美惡猶且相半，章句意之所緩，故合少謬多義，兼於斯必非不知明矣。長門上林殆非一家之賦，洛神池鴈便成二體之作。孟堅精正詠史，無虧於東主；平子恢富羽獵，不累於憑虛。王粲初征他文，未能稱是。楊脩敏捷，暑賦彌

日不獻率意寡尤則事促乎一日翳翳愈伏
而理賒於七步一人之思遲速天懸一家之
文工拙壤隔何獨宮商律呂必責其如一邪
論者乃可言未窮其致不得言曾無先覺也

荅樂藹書

丞相風道引曠獨秀生民凝猷盛烈方軌伊日
愬遺之感朝野同悲承當刊石紀功傳華千載
宜須盛述實允來談郭有道漢末之匹夫非蔡
伯喈不足以偶三絕謝安石素族之台輔時無
麗藻迄乃有碑無文况文獻王冠冕彝倫儀刑
寓內自非一世辭宗難或與此約閭閻鄙人名
不入第歛酬今肯便是以禮許人聞命慙顏已
不覺汗之沾背也

樂藹與沈右率書陳

夫道宣餘烈竹帛有時先朽德孚遺事金石
更非後亡丞相獨秀生民傍照日月標勝丘
園素履穆於忠義譽應華袞功迹著於彌諧
無得而稱理絕照載若夫日用闡寂雖無取
於錙銖歲功宏達諒有寄於衡石竊承貴州
士民或建碑表俾我荆南閱感無地且作紀
江漢道基分陝衣冠禮樂咸被後昆若其望
碑蓋禮我州之舊俗傾壘罷肆鄙土之遺風

庶幾前烈或不泯墜荆江湘三州策名不少
竝欲各率毫釐少申景慕斯文之託歷選惟
疑必待文蔚辭宗德愈茂履非高明而誰豈
能騁無愧之辭訓式瞻之望吾西州窮士一
介寂寥恩周榮譽澤遍衣食永惟道廕日月
就遠緬尋遺烈觸目崩心常謂福齊南山慶
鍾仁壽吾儕小人貽塵帷葢豈圖一旦遂投
此請

荅沈麟士書

獨徃之業雖聞前載高塵逸軌罕或共時未嘗
不拊袞興懷望古遐矚尊賢拔俗遙然沉冥自
遠陶貞之操義高篆策雖蔣訓不窺城市鄭真
名動京師何遠之有名山旣鄉內所豐清川又
坐卧可對不出戶庭而與禽尚齊美哉約少不
自涯早愛蟲鳥逐食推遷未諧夙願冀幽期可
托克全素履與尊弋釣泉臯以慰閑幕則生平
之心於此遂矣

與范述曾論齊竟陵王賦書

夫耿汎滄流則不識涯涘雜陳鐘石則莫辨宮商雖復吟誦環迴編離字滅終無所辨仰酬睿旨微表寸長

與陶弘景書

先生糠粃流俗超然獨遠列霓羽帶總轡雲霞
方當名書絳簡身游玄闕憑星夕卧望日朝餐
而至理深微曖焉難睹雖欲下風問道未知厥
路若夫栖遲閒遠咀嚙瓊芝出入清都師友靈
聖循崖反跡無缺惟心

報王筠書

覽所示詩實爲麗則聲和被紙光影盈字夔牙
接響頗有餘慙孔翠羣翔豈不多愧下情拙目
每付新奇爛然總至懽興已盡會昌昭發蘭揮
玉振克諧之義寧比笙簧思力所該一至于此
歎服吟研周流戀念昔時幼壯頗愛斯文含咀
之間倏焉疲暮不及後進誠非一人擅美推能
寔歸吾子遲比閒日清覲乃申

報博士劉沓書

生平愛嗜不在人中林壑之懽多與時奪日暮
塗殫此心徃矣猶復少存閒遠微懷清曠結宇
東郊匪云止息政復頗寄夙心時得休偃伸長
游居之地休澣所述之美景慕空深何可髣髴
君愛素情多惠以二贊辭采妍富事義畢舉句
韻之間光影相照便覺此地自然十倍故知麗
辭之益其事弘多輒當置之閣上坐卧嗟覽別
卷諸篇竝爲名製又山寺旣爲警策諸賢從時

復高奇解願愈疾義兼乎此遲比叙會更共申
折

與約法師書

周中書風趣高奇志託夷遠真情素韻水桂齊
質自接彩同樛年逾一紀朝夕聯事靡日暫違
每受沐言休逍遙寡務何嘗不比茨游覽南居
宴宿春朝聽鳥秋夜臨風匪設空言皆爲實事
音容滿口言笑在耳宿草旣陳楸檟將合眷往
懷人情不勝慟此生篤信精深甘此藟食至於
歲時包篚每見請求凡厥菜品必令以薦弟子
輒靳而後與用爲歡謔其事未遠其人已謝昔

之諧調倏成悲緒去冬今歲人鬼見分石耳紫
菜愴焉興想淚下不禁指遣恭送以克蔬僧一
飯法師與周情期契濶非止恒交覽物存舊彌
常楚切痛矣如何往矣奈何弟子沈約和南

序

梁武帝集序

文思安安欽明所以光宅日月光華南風所以
興詠日角之主出自諸生銳頂之君少明古學
漢高宋武雖闕章句歌大風以還沛好清談於
暮年夫成天地之大功膺樂推之寶運未或不
文武兼資能事斯畢者也我皇誕縱自天生知
在御清明內發疏通外典爰始貴遊篤志經術
究淹中之雅旨盡曲臺之奧義莫不因流極源

披條振藻若前疑往滯舊學罕通而超然直詣
妙援終古善發談端精於持論置壘難踰摧鋒
莫擬有同成誦無假含毫興絕節於高唱振清
辭於蘭畹至於春風秋月送殘望歸皇王高宴
心期促賞莫不超挺睿興濬發神衷及登庸歷
試辭翰繁蔚牋記風動表議雲飛雕蟲小藝無
累大道懷君人之大德有事君之小心爲下奉
上形於辭旨雖密奏忠規遺彙必削而國謨落
政存者猶多逮乎俯應歸運仰脩乾錄載筆握

簡各有司存如綸之旨時或染翰暨於設簾靈
罔愷樂在鎬鹿鳴四牡皇華棠棣之歌伐木採
薇出車杖杜之讌皆詠志摘藻廣命群臣上與
日月爭光下與鍾石比韻事同觀海義等窺天
觀之而不測遊之而不知者矣竊惟左史記言
右史記事君舉必書無論大小况乎感而後思
思而後積積而後滿滿而後言若斯而已哉謹
因事立名隨源編次

內典序

尚矣哉羣生之始也義隱三藏之外事非二乘
所窺自並識同奔隨緣受業人天異軌翺動殊
貫苦樂翻回愚智相襲莫不宅火輪驚擬酸醜
遷以寸陰之短晷馳永劫之延路精靈起伏萬
緒千名如來發源恒品蓋亦含生之一至于並
首爭馳斯固未或異也至於覆篲無始之初成
功斷籌之末塗遙業遠妙軫遐長累明積慧靈
覺獨曉巨相四八照曜於大千尊法二九包籠

乎無外六度之業既深十力之功自遠濟物以
權降魔匪力妙法輪轉甘露啓霏舟興六趣津
梁五道登四衢之長陌遊一乘之廣路斯旣已
事盈方等義滿神宣逮於大權協化對揚宗極
徇物兆於慈悲亡身著乎非已行符四等道昇
十地若乃靈性特達得自懷抱神功妙力無待
學成孤策獨驚莫知所限結習紛綸一隨理悟
又有捐情屏慮身心靡欲厭生死之長勤眷寂
滅而投軫遙然自得漏累煙銷且津心適道功

非一業雖會理共源而萌情或異是故高心邈
行分路同趨忘懷屏欲殊塗一致或草礫身體
投骸林澤內亡形相外馴兇虎或坐卧行立迹
不違衆禪業定門造次無爽安忍與金石同圓
戒行與寶珠等色雖秋禽年至春鮪時登而耿
介長蔬忡怛在念妙迹匪遐神塗密邇有悟必
通由之斯至故能藉智探虛乘心照理區區懷
抱融然靡執俱處三界獨與神遊包括四天卷
舒萬劫聞片議而陟道塲受一言而升彼岸長

夜未開心關自曉淹廻聖迹寢息神光旣負橐
以從師亦棲林以綜業足蹈慧門學通龍藏妙
吼遐徹鸞音自遠若夫义跪運心期誠匪迹而
導達神功照啓未悟唱說之美義兼在斯暨九
土殊風八方舛俗遊化所包事出弘獎皆足以
遷光淨域登儀寶地並黜華剪飾破愛辭親鼓
柅無生之流方軌俗表之路固已千佛摩頂七
住齊功至夫清信士女植緣曠劫雖復容服未
改而戒德內弘瞻毗耶而聳轡望波斯而迴軫

駕四禪之眇眇汎八解之悠悠若乃十號尊崇
三達摩儼雖法身非有而常住在躬能仁權迹
四門旣非悟道之始假滅雙樹寧有薪盡之窮
而天人瞻慕髣髴興情雕金範玉圖容寫狀靈
儀炫日寶刹臨雲或役鬼神之功或資髓腦之
力製非人匠寶以合成莫不龍章八彩瓊華九
色至乃齒髮傳靈衣履遺證聖迹彪炳日煥於
閭浮神光陸離星繁於淨刹若乃乘此直心推
誠闇往則半息可追一念斯至感降參差雲霏

霧委此又昭被象譯輝映縑圖夫秉牘書事其
流已遠蓋所以彪著往迹煥述遐聲雖篆籀異
文胡華舛則至于叶暢心靈抑揚訓義固亦內
外同規人神一揆墳典丘索域中之史策本起
下生方外之紀傳統而爲言未始或異也而經
記繁廣條流舛散一事始末褒理卷分或詞義
離斷或文字互出甫涉後條已昧前覽尋源討
流未知攸適雖精理瑩心止乎句偈而初悟始
學致惑者多且中外羣聖咸載訓典雖教有殊

門而理無異趣故真俗兩書遞相扶獎孔發其
端釋窮其致撤網去網仁惠斯在變民遷俗宜
以漸至精粗抑引各有由然是故曲辯情靈棲
心妙典伏膺空有之說轉綜兼忘之書該括群
流集成茲典事以例分義隨理合功約悟廣莫
尚於斯可以理求證成妙果若乃載司南之車
猶稱靡惑服四照之草得用不迷况乎六馬同
鑣萬流共貫日月經天方斯未已河海帶地夫
豈足云蓋人道之筌蹄群生有悟於此也

佛記序

含靈萬品既非記牒所窮物物稟生豈伊積塵
能計莫不起乎無理而至乎無生者也雖要終
有地而原始莫聞自非靈照特達宗極斯在則
理閉機初鑽叩事絕非唯四果不議固亦十地
罔窺邈乎悠邇有之而莫知所從者也如來覆
費爰始言登永路起滅廻還馳驟不息去來五
道大千比之毫端往復三界祇劫未足稱遠積
明累照念念不休離此生滅證成妙果固已空

有兼謝豈徒齊遷魯變而已哉旻昊區區猶秉
何言之稱至人無已寧以詞義爲珍蓋由萬感
相扇昧明代起業假緣開事須曉達一音所吐
無思不服義在徇物動非爲已法吼震灑於無
外甘露炳煥於龍宮開宗闡教致之有漸標四
諦於鹿園辨百非於雙樹廓不二之法門廣一
乘之長陌行迷復路弱喪知歸而因應回舛厥
塗不一白毫所照遍刹土於恒沙七步降踐墮
龍堆而攸被推極神道原本心靈感之所召跨

無邊而咫尺緣之所乖而法城而不覩及像教
云末經紀東流熱坂艱長寒山峻阻橫書左字
累萬方通剪葉成文重譯未曉自此迄今千祀
過半靈迹稍啓名僧間出律藏方等行來漸至
蘊乎西國未至者多雖法身常住之奧遠二諦
三假之淵曠悟道求宗於斯可足而能仁體茲
大聖寔爲本師悠悠羣品精靈所係迄于前因
往業多所昧畧然神化應感參差互見又世胄
名氏本國俗緣散析衆部卒難討究神功妙力

同出異名降胎求道寧止一相託生迦維本由
權迹出自北門非悟法之始遍照東方豈通化
之極適道已來四十九載妙應事多宜加總緝
共成區畛至於經像舊錄境剎遺記開勸之功
於斯自遠大權弘曠亡身以濟物應真耿介標
心非爲已分蹤或異適未必同神塗詭互難以
臆辨靈怪僞儻言語斯絕圖澄之龍見趙魏羅
什之鳳集關輔犍陀近遊京洛單開遠適羅浮
雖迹與俗同而意無可察塗出玉門法座不遠

七處九會峨然在目靈應肸鬻徧富延澤以西
光景歲隼多見天山之表有志奇僧每經游歷
神迹昭然咸有文注繁蕪舛雜實須裁整分五
道於人天設重牢於厚地各隨業力的焉不差
此皆卷舒真俗終始名相其玄塗幽遠大則直
至道場其徵證切近小則開勸晚學斯寔兼濟
之方舟大悲之廣路雖復智昏視肉形窮尺捶
緣動必應又况進於此者乎是以至聖慇懃每
存汲引垂文見意貽厥將來皇帝行成無始道

承曠劫十號在躬三達靡礙屈茲妙有同此轉
輪傷昏慙惑久迷正路悱發之徒空懷鑽仰條
流緬曠事難總一志淺業勞迄用無就非所以
闢彼四衢出之火宅者也乃詔中書侍郎虞閭
太子洗馬劉浚後軍記室周捨博尋經藏搜採
註說條別流分各以類附日少功多可用譬此
名曰佛記凡三十篇其有感應之流事類相似
止取其一餘悉不書或後死而更主陳說經見
事涉杳冥取驗無所亦皆靡載同之闕疑或憑

人以言託想成夢尤難信曉一無所錄若夫欲
遐適者必遠記所從欲悟道者必妙識所宗然
後能允得其門親承音旨未有不知厥路莫辨
伊人膠月闇踐自與理合所以引彼衆流歸之
一源可令莘莘含識望塗知往案砥矢而言歸
不廻遑於岐路俾厥清信之士亦有取於此云
約進啓云佛記序今謹以上
呈詞義無取伏懷自慙謹啓

梁武帝勅沈約撰佛記序附

去歲令虞闡等撰佛記并令作序序體不稱

頻治改猶未盡致尋佛教因三假以寄法藉
二諦以明理達相求宗不著會道論其指歸
似未至極乃不應以此相煩亦是一途善事
可得爲屑筆不以故指勅闢等結序末體又
似小異

後又勅云記序始得
看今勅緣寫流布

慕品序

奕之時義大矣哉體希微之趣含奇正之情靜
則合道動必適變若夫入神造極之靈經武緯
文之德故可與和樂等妙上藝齊工支公以爲
手談王生謂之坐隱是以漢魏名賢高品間出
晉宋盛士逸思爭流雖復理生於數研求之所
不能涉義出乎幾爻象未之或盡聖上聽朝之
餘因日之暇廻景紆情降臨小道以爲凝神之
性難限入玄之致不窮今撰錄名氏隨品詳書

俾粹理深情永垂芳於來葉